



kat. komp.

39274

Mag. St. Dr.

P

Teol. 3058

Nuccini Seb. Monitum sacerdotale in  
Synodo Diocessana Cracoviensi 1634  
Die 18 Octobr. Clero congregato datum.



Biblioteka Jagiellońska



stdr0000393



# MONITVM SACERDOTALE;

IN SYNODO DIŒCESANA  
Cracouiensi, 1634. die 18. Octob.  
Clero congregato.

A

R. SEBASTIANO NV CERINO  
S. Theologiæ Doctore,

Datum.



CRACOVIAE,


In Officina Francisci Casarij, Anno Domini  
M. DC. XXXIV.

vid. Y. V. 92a.





*Ad Illustriss: & Reuerendiss: Dominum;*  
**D. IOANNEM WĘZYK**  
ARCHIEPISCOPVM GNESNENSEM,  
Legatum natum, Regni Primatem, ac primum  
PRINCIPEM.

 *OLuntate eorum, quorum dicto audiens esse  
debeo, monitum hoc Sacerdotale, prodit in  
lucem, & prælo fit iuris publici. Quia au-  
tem ex usu est, ut verba sacra facturus  
gregi alicuius Antistitis, eum prius adeat,  
ut sibi dicendi potestatem faciat: idcirco  
& ego, Monitum hoc vniuerso regni Clero daturus, ad Te Illu-  
strissime & Reuerendissime Domine, tanquam Regni Prima-  
tem Antistitem venio, reuerenter petendo, ut mihi benedicas.  
Faxit Deus, ut Tuæ Illustrissimæ & Reuerendissimæ Celsitud:  
benedictione, Monitum, monile Sacerdotum efficiatur: erit  
verò etiam, mea erga Illustriss: & Reuerendiss: Celsitud:  
Tuam, veteris & debitæ obseruantia (si maius non prompsero)  
publicum argumentum.*

39274  
I 62  
*Illustriss: & Reuerendiss: Celsitud: Tue*

Cliens & Sacerdos

SEBASTIANVS NVCKERINVS.



# EXHORTATIO

IN SYNODO CRACOVIAE  
HABITA.

**D**VÆ potissimum sunt causæ, ob quas, homines congregari, & cætum facere, consueuerunt: altera, quando læticia, præsertim publica, ad iucundum sui vsum, velut odor gratissimus, attrahit: altera, quando è contra, casus aliquis lugubris, ad obuiandum malo communi, multos tum consilio, tum ope profuturos, aut saltem spectatores, aduocat. Quænam ex his duabus, præsentis Sacerdotum cætus, causa sit: interest plurimum, vt sciatur. Vnde autem cognoscetur? Non est longè petenda probatio. Scimus enim, Comitiorum proximè præteritorum consilio, duplex onus Sacerdotibus esse impositum: exactionis quintuplicis ratione decimarum pendendæ solutio: & præterea Donatiuum seu Contributio. Nemo vtrumq; non poterit mirari. Nam cum ex vso sit, vt pastoribus oues, lac & lanam suppeditent: nunc è contra, vt pastores tondeantur, & lanam ouibus subministrent, expectatur. Tributa, iuxta morem receptum, ab inferioribus subditis, Superiores, iure suo exigunt: nunc è contra, à superiori statu Ecclesiastico, inferior sæcularis contributionem flagitat. Quid sibi vult hæc boni ordinis mutatio? Sed leuius adhuc vtrumq; tolerari potuisset, si animo beneuolo, hæc à nobis quærentur:



sed quia, vt experti fumus, odio quodam inueterato, status Sacerdotalis à sæculari prægrauatur: hic ille est dolor, qui maximè premit. Hic ille est fons cænosus, studio diligenti purgandus, ne ex eo aqua turbida, toties nobis sit bibenda: odium inueteratum radicitus euellendum. Vt id tandem aliquando feliciter aggrediamur: proposui in Venerabili isto Sacerdotum cætu, hoc dicendi argumentum sumere, vt ostendam: Qua ratione Sacerdotes, statui suo Ecclesiastico, authoritatem & reuerentiam apud sæculares parare, & maleuolentiam illorum vincere possint ac debeant. Faxit Deus, vt ad tantam argumenti huius grauitatem, ostensionem spiritus ac virtutis possim asferre.

Infame est spectaculum, Deo & Angelis eius execrabile, videre statum Sacerdotalem contemni. Eiusmodi enim contemptus, partim est proles conscientiarum, multis iam sceleribus inquinatarum: partim mater multorum malorum, quæ ex eo nascuntur. Nascitur enim fidei Catholicæ & legis diuinæ neglectus: dùm vtriusq; interpres Sacerdos negligitur. Nascitur virtutis ac vitæ sanctioris vilipensio: dùm magister eius Sacerdos vilipenditur. Nascitur, Altarium, Templorum, Sacrosancti Sacrificij, Sacramentorum irreuerentia: dùm horum omnium ministro Sacerdoti, debitus honor non redditur. Euigilandum itaq; est animis, vt audiamus, qua ratione authoritatem recuperare, & maleuolentiã sæcularium vincere, valeamus.

Sumo tanti mali remedium, ab ipso Prothomedico, primo Christi vicario, D. Petro; qui cum in ipsis primitiua Ecclesiæ initijs, ingens odium contra Christianos

con-



conflatum vidisset: tale pharmacum illi adhibuit & reliquit. *Charissimi* (inquit in sua Epistola) *obsecro abstinere vos à carnalibus desiderijs, conuersationem vestram, inter gentes bonam habentes, ut in eo quod detrectant de vobis tanquam malefactoribus, ex bonis operibus vos considerantes, glorificent Deum.* Ecce irreuerentiæ antidotum, bona conuersatio, vita exemplaris, ex bonis operibus, velut polymita vestis contexta. Ecce remedium malevolentiae, tantò vtilius ac efficacius, quantò magis est ex verbis Christi deriuatum. Audite enim, quomodo Christi verbis, verba D. Petri consonent. Euangelista S. Mattheus refert: Christum sic aliquando suos Apostolos allocutum esse: *Ecce ego mitto vos, sicut oves in medio luporum.* Vehementer hæc verba D. Gregorius M. admiratur, & cum eo admirari quisq; potest ac dicere: Quid sibi vult benignissime IESV, quòd oves tuas Apostolos, in medium luporum mittis? Quis vnquam boni pastoris officio functus, imbellem gregem, bestijs rapacibus, sciens volens obiecit? Nonne ipsemet docuisti, bonum pastorem potiùs debere pro ouibus animam ponere, quàm eas rapiendas, dispergendas, lupis relinquere? Crescit admiratio, quia dixisti: Mitto in medium luporum. E medio hostium circumquaq; cingentium, quam difficilis spes euadendi, ne dicam impossibilis? Quid sibi ergo vult consilium à te profectum, à te inquam, in quo sunt thesauri sapientiæ, & scientiæ Dei absconditi? Respondet, ipsemet S. Gregorius. Si Christus verba fecisset de ouibus, quæ sunt pecora campi, & animalia vsu rationis carentia, non absuisset à probro, tales



oues mittere in medium luporum. At quia locutus est, tam de ouibus quàm lupis spiritualibus: ad vincendam rabiem talium luporum, nihil efficacius, modestia, mansuetudine, innocentia ouibus ingenta. Hæc truculentiam mitigat, componit, sedat. Quod totum inde proficiscitur, quia probitas vitæ auctoritatem parit & reuerentiam, ac maleuolentiam in beneficentiam commutat.

Testem huius adduco Sacram Scripturam. Liber Machabeorum sic docet. *Cum Ciuitas sancta habitaretur in omni pace: leges etiam adhuc optimè custodirentur, propter Oniæ Pontificis pietatem fiebat, ut Reges & Principes, locum summo honore dignum ducerent, & Templum maximis muneribus illustrarent: ita ut Seleucus Rex Asiæ, de redditibus suis, sumptus omnes staret ad ministerium Sacrificiorum pertinentes.* O sæculis omnibus memoranda, pietas Oniæ Pontificis, quanta bona peperisti? Tu fecisti ut locum Hierosolymitanum Reges & Principes, summo honore dignum ducerent. Tu fecisti, ut Templum, maximis muneribus illustrarent. Sed minora sunt ista: sequuntur maiora, & magis miranda. Seleucus Rex Asiæ, homo paganus, legis Diuinæ planè ignarus, de redditibus suis, sumptus præstabat ad Sacrificia lege Moydis præscripta. Quæ societas luci ad tenebras? Quid Regem Ethnicum, religione dissimilem, ritibus Iudæorum spontè vectigalem fecit? Pietas Oniæ Pontificis, inquit scriptura. *Viuat, atq; etiam viuat, vitæ probitas, quæ ex lupis oues, ex lapidibus facit filios Abrahæ.* Nemo autem existimet, vnus Oniæ Pontificis pietatem, talis efficaciam extitisse: multi probitate vitæ



vitaë illi affines, & proinde pares effectû, possunt ostendi. Præclarus Annalium scriptor Baronius refert, Summum Romæ Pontificem Hormisdam, tanto virtutum splendore fulsisse, vt earum exemplis, Theodoricum Regem tunc Italiæ, hominem hæreticum, eumq; Arianum, fidei Catholicæ infensum, eò pertraxerit, vt munera argentea, Templo D. Petri Vaticano (quod Romanorum Pontificum sedes est) dono miserit. Inspectis sanè hisce testimonijs, quisq; poterit intelligere illud quod idem liber Machabeorum dixit: *Non gentem propter locum, sed locum propter gentem Deus elegit.*

Sed vereor ne quis dicat. Probasti, quia ob pietatem eorum qui præsunt, locis sacris reuerentia est exhibitâ: nunquid pari facultate & felicitatè personis Ecclesiasticis exhibebitur? Leuissîma est ista dubitatio. Tota enim Philosophorum schola eam refellit, & dicit: Propter quod quid tale, & ipsum magis est tale. Ab igne res caleſcunt, ergo ignis ipse calidior. Melle panis illitus fit dulcis: ergo mel ipsum est dulcius. Sol inferiori toti mundo lumen impertitur: ergo ipse lumine magis abundat. Eodem modo nos argumentabimur. Ob pietatem Sacerdotum, locis sacris reuerentiâ exhibetur, ergo magis ipsis Sacerdotibus exhibebitur. Firma est hæc, & satis clara probatio. Sed volo ego quæſtionem facti, factorum testimonijs esse decisam. Clodoueus Rex Franciæ, adhuc tunc paganus, à religione Christiana seiunctus, S. Genofenam, ob solam vitæ sanctimoniam, quanta veneratione profecutus est? Dicerem, nisi temporis articulo constringerer. Idem Rex ob  
ean-



eandem causam, qua animi deuotione S. Remigium, velut Patrem coluit? Eudocia Imperatrix, foemina gentilis, S. Simeonem Stylitam, quanta submissione venerata est? Basiliscus Imperator, re & nomine, verus basiliscus, homo ferus & lupus, quam se mitem & ouem S. Danieli Stylito susebat? Sed mitto istos minus notos: prodeat in lucem Herodes Rex Iudeæ, scelere nobilis, qui sacrilegas manus S. Iohanni Baptistæ, lucernæ ardenti & lucenti extinguendæ, iniecerat. Is quando sanctimoniam D. Baptistæ viuientis intuebatur, quid faciebat? Inquit S. Marcus Euangelista: *Herodes metuebat Ioannem, & custodiebat eum, & audito eo multa faciebat.* Vnde hominem impium talis religio inceserat? Respondet S. Marcus: quia sciebat eum virum esse sanctum & iustum. Sanctum Deo, iustum hominibus. O quanta vis sanctimonix & vitæ exemplaris. Scitis ne vnde? quia habet virtus quoddam diuinitus sibi inditum supra scelera dominium, ita vt aspectu ipso terreat omnem timidam iniquitatem, semper sibi malè consciam: terret impios, feras licet indomitas. De feris siluestribus inquit Dauid in Psalmo: *Facta est nox, in ipsa pertransibunt omnes bestix siluæ. Ortus est Sol, & in cubilibus suis collocabuntur.* Soli est simillima virtus, quæ suo splendore oculos flagitiosorum perstringit, & eos ad cubilia sua, vt latitent, propellit. Sed si lux pietatis in Sacerdotibus qui sunt lux mundi, defecerit: si nox facta fuerit: in ipsa pertransibunt omnes bestix siluæ. Veniet hora earum, & potestas tenebrarum.

Cum ergo tanta vis sit probitatis, contra omnem impro-



probitatem, iure D. Paulus eos, quo rum authoritatem honoratam esse cupiebat, diligenter monebat, vt exemplo vitæ inculpatæ prælucent. Hinc illa ad Timotheum Antitistem verba: *Nemo adolescentiam tuam contemnat: exemplum esto fidelium, in doctrina, in conuersatione.* Quæso aduertite Diuum Paulum instar prudentis medici fecisse: prius morbum inspexit & indigetavit: deinde medicinam præseruantem, quæ optima est prompsit. Prius meminit contemptus, dicens: *Nemo adolescentiam tuam contemnat.* Deinde antidotum eius protulit addens: *Esto exemplum fidelium.* Eodem amuleto & alterum Sacerdotem Magnum Titum instruxit dicens: *In omnibus te ipsum præbe exemplum bonorum operum, in verbo, in integritate, in grauitate.* Poterat dicere Titus: Quorsum hoc monitum, ô Paule Doctor gentium? Respondet: *Vt is qui ex aduerso est vereatur, nihil malum habens de vobis dicere.* O quàm salubre consilium. Etenim quando quis habet, quod Sacerdoti per probrum obijciat, armatus est, telum habet quo vitam eius fodiat, ferendi locum facilè inueniet. Qui autem nihil mali habet quod dicat: inermis est, telum non habet, audax esse non potest, quantūuis audaciam præ se ferat. Si ergo ô Sacerdotes vultis, vt is qui ex aduerso vobis est vereatur, & vos non contemnat: in omnibus præbete vosmet exemplum bonorum operum. Hoc est primum & maximum ad authoritatem & reuerentiam recuperandam monitum: hoc ad vincendam sæcularium malevolentiam optimum consilium.

Venio ad alterum, quod paucis verbis expediam. Vni-



uerso Clero, ore D. Pauli dico: *Ministerium tuum imple.* Quare? quia facilius homines ad virtutem alliciuntur, si dotem habuerit: si indotata fuerit, pauci erunt qui eam expetant. Quæ autem est dos virtutis? Esse vtilem alteri ministerio officij sui, hoc est, quod dicit Psalmista magnus: *Sacerdotes tui induantur iustitiam, & sancti exultent.* Quare iustitiam præcipuè nominat? quia hæc iubet reddere cuiq; quod suum est, iubet ministerium alteri debitum implere. Agam hic simpliciter & breuiter. Potestne quis rem vsui suo commodam contemnere? Potest quidem, praua aliquis opinione imbutus, rem vtilem, inutilem esse sibi credere, ac proinde eam leuipendere: sed qui veritatem & vtilitatem eius incorrupto iudicio discernit, nunquid eam poterit negligere? Calceum bonum, vestem, suppelectilem nemo abiicit: quia hæc omnia vsus chara facit. Vtinam, ô Sacerdotes, vsus & ministerium vitæ Christianæ nos sæcularibus charos reddat. Ipsum Sacramentum Ordinis id à nobis iure suo exigit. An nescitis Sacramenta esse duplicia: alia quæ ad propriam sumentis illa sanctificationem spectant, & talia sunt quinque: alia quæ ad vtilitatem aliorum, procurandam & promouendam sunt instituta, v: Matrimonium ad honestam prolis educationē. & Ordo sacer ad magisterium vitæ Christianæ sæcularibus impendendum. Ipsum ergo Sacramentum Ordinis clamat & monet: *Sis, ô Sacerdos aliis utilis, ministerium tuum implendo.* Scitè satis Origenes: *Sacerdos, inquit, est instar vitis, quæ si fructu onusta fuerit, honorabilior est cæteris: si fructu caruerit, contemptibilior est cæteris.* Sal enim infatue-



tuetum, ad nihilum valet ultra, nisi ut mittatur foras & cō-  
culcetur ab hominibus. Hæc ille verè. Sed verè ac simul  
horribiliter ipsemet Deus per Prophetam Ezechielem:  
*Fili, inquit, hominis, quid fiet de ligno vitis? inter omnia ligna  
nemorum? Nunquod tolletur de ea lignum, ut fiat opus, aut fa-  
bricabitur paxillus, ut ex eo dependeat quodcunq; vas? Ecce  
datum est igni in escam, cui ignis infernali, doloribus omni-  
bus refertissimo, æterno. O terribile inutilis ligni iudiciũ.  
Stat enim firma, lata sententia: Inutilem seruum eijcite in  
tenebras exteriores: ibi erit fletus & stridor dentium. Intel-  
lexistis hæc omnia?*

Finem ergo dicendi faciam, & memoriæ vestræ hæc  
duo imprimam: Præbete vosmet exempla bonorum ope-  
rum, ministerium vestrum implete. Morem quis huic di-  
cto geret: audiet & utinam audiat, illud Christi plenum  
solatij verbum: *Euge serue bone & fidelis, intra in gaudium  
Domini tui.* Benedictus Dominus Deus Israël, à sæ-  
culo usque in sæculum,  
fiat, fiat.








111. 13.







1000